



# গণপ্রজাতন্ত্রী বাংলাদেশ সরকার

## তথ্য অধিদফতর



PRESS INFORMATION DEPARTMENT. GOVERNMENT OF THE PEOPLE'S REPUBLIC OF BANGLADESH

তথ্যবিবরণী

নম্বর-২৩৪

### রাজশাহী বিভাগীয় উন্নয়ন সমন্বয় সভা অনুষ্ঠিত

রাজশাহী; ৫ বৈশাখ (১৮ এপ্রিল):

আজ বিভাগীয় কমিশনার কার্যালয়ের সম্মেলন কক্ষে রাজশাহী বিভাগীয় উন্নয়ন সমন্বয় কমিটির সভা অনুষ্ঠিত হয়েছে। রাজশাহী বিভাগীয় কমিশনার জি এস এম জাফরউল্লাহ, এনডিসি এর সভাপতিত্বে এ সভা অনুষ্ঠিত হয়।

সভায় স্বাস্থ্য বিভাগের পক্ষ থেকে জানানো হয়, গত মার্চ মাস থেকে সরকার যে সরকারি হাসপাতালে অফিস সময়ের পর নির্ধারিত ফি'র মাধ্যমে চিকিৎসা সেবা চালু করেছে, সেখানে নওগাঁ সদর হাসপাতালসহ রাজশাহী বিভাগের চারটি উপজেলা স্বাস্থ্য কমপ্লেক্স রয়েছে। পর্যায়ক্রমে এ সংখ্যা আরও বাড়ানো হবে।

চলমান তীব্র দাবদাহে সুস্থ থাকার জন্য দিনের বেলা অপ্রয়োজনে ঘর থেকে বের না হওয়া, ছায়াযুক্ত স্থানে অবস্থান নেওয়া, প্রয়োজনে একাধিকবার গোসল করা, প্রচুর পানি ও তরল খাবার গ্রহণ এবং চা-কফি জাতীয় খাবার যা শরীরের তাপ বৃদ্ধি করে সেগুলো পরিহার করার জন্য সভায় স্বাস্থ্য বিভাগ থেকে পরামর্শ দেওয়া হয়। এ সময় হেপাটাইটিস থেকে বাঁচতে বাজারের অস্বাস্থ্যকর পানীয় পরিহারেরও পরামর্শ দেয়া হয়।

রাজশাহী মহানগরে আগুন নিয়ন্ত্রণে কর্মপরিকল্পনা তৈরি ও মহড়া সম্পন্ন হয়েছে বলে সভায় ফায়ার সার্ভিস ও সিভিল ডিফেন্স দপ্তর থেকে জানানো হয়। দেশের বিভিন্ন স্থানে সাম্প্রতিক অগ্নিকাণ্ডের বিষয়টি তুলে ধরে এ দপ্তরের পক্ষ থেকে বলা হয়, তীব্র দাবদাহে সামান্য স্পার্ক থেকে আগুন লেগে যাচ্ছে। এজন্য মার্কেট ও গ্রোথ সেন্টারগুলোর দায়িত্বপ্রাপ্তদের সচেতন থাকাসহ পাহারার পরামর্শ দেয়া হয়েছে।

সভায় অন্যান্য দপ্তর প্রধানগণ নিজ নিজ দপ্তরের উন্নয়ন কার্যক্রম এবং অন্য দপ্তরের সাথে সমন্বয়ের ক্ষেত্রগুলো তুলে ধরেন।

সভাপতির বক্তব্যে বিভাগীয় কমিশনার তীব্র তাপদাহে মানুষসহ প্রাণী, মৎস্য ও ফসল রক্ষায় করণীয় বিষয়ে সংশ্লিষ্ট দপ্তরগুলোকে লিফলেট বিতরণের মাধ্যমে সর্বসাধারণের মধ্যে বহুল প্রচারের ব্যবস্থা গ্রহণের অনুরোধ জানান।

রাজশাহী বিভাগের বিভিন্ন সরকারি দপ্তরের দপ্তর প্রধানগণ এবং বিভাগের আট জেলার জেলা প্রশাসকগণ এ সমন্বয় সভায় অংশগ্রহণ করেন।

.....

তৌহিদ/সিকান্দার/২০২৩/১৫.০০ঘ.